

湖  
海  
文  
傳

湖海文傳卷四十九

青浦王 昶德甫輯

碑

文華殿大學士太傅朱文端公神道碑 袁枚

乾隆元年秋九月十四日

今天子命車駕

親臨大學士朱公第視疾又四日公薨

天子再奠於其第加贈太傅諡文端冬十月公長子通政使  
右通政必堦次子翰林院庶吉士璣輿機歸葬剛日已卜求  
文其貞珉以光揚 休命枚伏考史冊堯學於子州父舜

學於務成昭古之聖人皆有所從學以增崇其欽明二臣者  
雖訐謏無聞而要其能爲堯舜之師其人必邁臯夔而上公

奉

世宗詔侍

皇上青宮最久

皇上登極未一載仁言聖政重累而下九州入陔靡不異音同歎慶堯舜復生然則公之敢沃之功可以想見而公之風概又豈可求諸唐虞下哉公諱賦字若瞻號可亭世居江西高安縣公宣髮廣額音中黃鐘鬚數十莖羅羅可數康熙癸酉舉人甲戌進士入翰林改湖廣潛江知縣治獄忤總督某巡撫劉公殿衡至曰吾久聞朱令賢今觀所爭獄益信爲解於督臣而薦之遷刑部主事轉郎中督學陝西尹奉天再遷左都御史巡撫浙江

世宗登極累遷吏部尙書文華殿大學士故事宰相泣任必

請翰林衙門公去而復至海內榮之其撫浙也浙西瀕海衝洋石墩多風魚之災公榷老鹽倉淤中小鹽渚夏蓋山功成岷廬大安其任風憲也大將軍年羹堯以大逆誅父遐齡年八十餘法當從坐九卿俱畫諾矣公不署名

世宗責問公奏以子刑父非法也臣簿錄年氏家書遐齡訓其子甚嚴子不能從以陷於罪罪在子不在父

世宗頷之遐齡竟免其辦治直隸營田也以漳衛諸河爲經以趙北口兩淀爲咽喉穹壤引泉凹坻衛隄溉田六千頃其督賑陝西也安流庸禁邊糴勸糴粟請留漕立醫廠增驛夫雨隨禱降民與災忘公潛躬味道神識凝然而於致贊軍國靜密詳審 朝廷倚如金城故爲都御史時請終父喪 聖祖勿許在營田所請終母喪

世宗勿許公雞斯徒跣涕力請至於章三四上黃門侍御  
皆咋舌瑟縮奪毀奏稿九卿大臣慰勸者相環而公陳之愈  
力萬不得已則引古墨經禮請從征西戎

兩聖人愛其忠閱其孝重違其意乃

詔如怡賢親王居

母喪故事勿朝會勿吉服勿補原官 國家有大事公卿詣  
廬中咨之

今上在藩邸時聞公講生民休戚歷朝治亂尤悉既卽位凡  
所陳奏無不張施公自知道可大行輔志弊謀如恐不及乾  
隆元年首陳除開墾省刑罰兩疏其他語秘外不盡知然公  
已七十二歲髮頽禿且盡

天子恐用公晚一切大事虛已咨詢公亦忘身徇國竭望翠  
之思卒以成疾而薨其遺表曰臣遭 盛世入綸扉既老且

疾口垂閉矣伏念國家萬事根本君心所重者理財用人而已臣核國儲經費綽然後有君利之臣倡爲加增者幸勿聽之至於君子小人之辨尤易混淆尙書逆于汝心遜于汝志二語願

皇上時以爲念則臣魂魄長逝永無遺憾章上海內傳誦之所著有春秋詳解三禮纂名臣循吏等傳夫人陳氏先公亡合葬於某鄉之某里銘曰

惟天以

聖清有德篤生良弼惟

帝以聖相有庸恩始榮終奕奕太傅學爲儒宗禋躬何約艾物何豐孤終旣協陰陽就宮變醕養瘠休我王風凡彼百辟倖倖衝衝或才之忌或盛名之攻至於太傅而曰君子竟罔

不食同梁木壞矣心支明堂舟楫朽矣慮海波之或揚讀公  
遺表惓惓

君王身墜泉底心立 殿旁臯謨說命餘音琅琅配於  
太廟祀於太學書於旂常葬於礲礲松栢九丸羊虎躍躍永  
峙一碑以抗五嶽

文淵閣大學士太保史文靖公墓碑

劉綸

乾隆二十八年癸未五月相國溧陽史公以上壽正終於位  
上臨軒軫悼 詔皇六子臨喪奠醢晉贈太保祀京師賢  
良祠謚文靖視禮官所上宰臣飾終常典破格有加其年冬  
歸葬某鄉之原公子奕簪等請爲文揭諸墓按狀公諱貽直  
字儼絃號鐵崖先世壯侯崇封於溧陽因家焉世爲江南著  
望曾祖諱某中書舍人祖諱鶴齡翰林院編修考諱襲經

筵日講官詹事府詹事皆以公貴 贈光祿大夫太子太保  
文淵閣大學士兼吏部尚書曾祖妣祖妣妣皆 贈一品夫  
人公生長世族嫻掌故凡內外銓之利弊金穀之登耗刑名  
兵屯之得失稟於家訓者爲多康熙己卯中順天鄉試明年  
成進士入翰林先輩釋褐之齒最少無喻公迄後六十年爲  
今上乾隆庚辰科士之雋南宮者公與之執同年禮 賜  
御製詩一篇寵爲盛事公自雍正初由翰林侍讀學士署掌  
院學士自癸卯迄戊申屢荷 簡擢凡任公吏部侍郎者  
五戶部工部侍郎者再六官之司罔不爰厯又凡疆吏以疑  
獄告 亟命公馳傳往勘多得實稱 旨自是宣昇旌  
節踐更臺閣駸駸嚮用日隆矣公之爲閩督也舊日成臺澎  
者當代歸過番社輒橫索驕蹇不奉法鎮臣以非所轄噤弗



治公檄監臨官刻郵程勸還部伍番民安堵福興漳泉四郡  
地瀕海貯穀易敗公核冊籍知臺灣有應碾運內地米請易  
穀分貯各倉卽碾倉穀給兵食推陳易新兵民交便之兩江  
殷劇號難治公蒙 異數恩以鄉人攝節制上疏再辭  
批答有體卿難爲之 諭而公泣事亦不引嫌不撓法官

吏帖服民用大和陝西當軍興甫竣五方旅處俗偷敝

命公以左都御史往領宣諭化導事尋卽撫其地時楚省以  
協運糧糈赴陝督臣請開潯丹河公條陳其不可狀甚悉事  
遂寢又西安有屯戶籍均內地而故事獨輸本色米支兵餉  
往往苦貴糴公用軍需餘穀爲置常平倉俾借領如例至今  
以爲法

今皇帝御極公以舊臣入

覲

眷愈厚公上言一銓部

別流品容臺典禮樂言官掌風憲請以正途充選一品官進  
用請以特晉優異等以資格敘中才一豫省報增墾地多沙  
磧畝田難按則升科兼請申令守勸輸之禁疏入皆勅部  
議行既授公湖廣總督先是黔粵有苗警楚兵率赴調汎單  
多竊發蒲寅三鳳老一狙獷爲渠魁公至簡軍實嚴守衛侍  
勿虞若無暇爲翦滅計一旦密檄鎮臣提勁卒二千入山勦  
捕蒲鳳就縛黨惡者無遺種或問公公曰吾前故遲之使不  
爲鋌走備且密審其山川阨塞往來栖遁之道也鎮楚二年  
由兵部尙書入爲戶部尙書遇公卿集議公徐出一語洞中  
要害九列更事無出公有者遂以乾隆癸亥協辦大學士明  
年授眞遭逢盛際準夷回部以次削平拓疆二萬餘里公  
皆在政府時從容承召對移晷乃出而公謹慎周密雖

子弟不得與聞殆前史所云精練少年有不如專門名家有  
不逮者公以未弱冠登甲榜迄躋大臺在外督撫七省一入  
內閣中被薄譴 賜環首尾居相位垂二十載名注 朝  
籍總六十有四年於 大臣未有其比厥惟 國家重熙襲  
慶 景運延洪獲 耆成之瑞亦惟公殊姿偉抱宣昭世德  
重荷

三朝恩遇式克欽承嗚呼盛矣公之再相也年已七十

特旨得 駙輿入省恭逢

慈寧大慶列公九老班諸王下

御詩比富鄭公文潞公後公偶示微疾 御醫衛士絡繹於

道今年春以衰老引退

上不許惟 詔盛暑祁寒毋上直公三子突壤以潞安知

府

陛見奉

命留京補四品堂上官侍公起居

優禮殊常信人臣之極也公好獎植士類人或不知自典試  
粵東至三主禮部試名公鉅卿多出其門與後生言推誠教  
誨不爲隱情惜已蓋天性固然公生於壬戌正月二十日距  
易名時得年八十有二配許夫人有賢德先公卒子三人長  
奕嚮官左春坊左贊善次奕昂官廣東布政使司布政使三  
卽奕環女幾人孫男幾人孫女幾人系之銘曰

沈沈壯侯系漢外氏允武允文胙姓南紀維公之生爲邦之  
獻鏡物忘疲飫理斯鑒出則方叔入則山甫民言用酌衆善  
斯取公贊黃扉六符階泰雍容揄揚應斯嘉會惟民壽穀  
惟公壽考爲世貞符用竊至道弗祿孔阜懋德孔敦厥有  
餘慶庇茲後昆

光祿大夫吏部尙書協辦大學士事謚文定孫公神道  
碑銘

陳兆崙

乾隆十有八年十有二月六日吏部尙書協辦大學士事山西興縣孫公卒於位距其生康熙二十有二年二月十有七日享年七十有一子刑部員外郎孝愉奉遺疏奏上得旨孫嘉淦老成端謹學問淵醇宣力有年勤勞懋著前因患病卽遣太醫診治並命皇子往視尙冀速痊今聞溘逝深爲軫悼着派散秩大臣一員侍衛十員往奠茶酒賞銀一千兩辦理喪務應得卹典該部察例具奏尋准部奏賜祭葬謚曰文定自中朝士大夫以至販鹽臺輿之賤同聲一哭榮哀具矣人生得此於人

主及並世之人可以無憾矣卜葬有日孤馳書請銘其隧夫

埋石以垂久遠墓志以之揭銘於碑殆將令途人指識其處  
輒想其人用以興起秀頑扶樹風化意惟芟繁文牖大要勿  
弁勿離或庶幾焉按狀公姓孫氏諱嘉淦字錫公號懿齋先  
世自代來遷遂爲興縣人世居邑之臨河里公年十有九入  
縣學爲諸生樵蘇不給嘗躬自腰鎌入山風雪無所避其勤  
苦有如此者伯兄貞淦無故爲人所戕公父不勝忿手及其  
仇吏持之愆公年未弱冠奔走呼籲一晝夜行三百餘里叩  
大府自承代父罪事竟得解與仲兄鴻淦及弟揚淦友愛至  
篤而揚淦性真率好直言或至過激人不能堪公怡然受之  
遇兄弟之子如已子在翰林時聞母病請假于掌院不待報  
卽行處鄉黨恭謹有加父老忘其貴人周卹貧族惟力是視  
其獨行有如此者康熙五十二年

萬壽恩科成進士改庶吉士乙未授翰林院檢討越十年

世宗憲皇帝卽位數上封事嘗因

召對

先帝手指公示九卿曰朕卽位以來孫嘉淦每事直言極諫朕不惟不怒且嘉悅焉爾等當以爲法以故雍正初連充鄉會試同考官一充江西鄉試副考官由檢討擢國子監司業蓋旌其直也乾隆改元以左都御史上三習一弊疏

上深納之復以米價騰踊嚴造酒之禁爭之尤力直聲益振其事

君樸忠有如此者遇僚友恂恂無疾言遽色及事有不可未嘗不辨辦之不從或至劾奏以故人憚其慤而又服其和其與人溫良有如此者公領國子監事最久雍正二年以司業視學江蘇卽任遷祭酒尋調直隸九年由府尹遷工部侍郎

十年轉刑部兼辦吏部府尹祭酒如故乾隆初遷刑部尙書  
仍總理國子監事在官先後拓學舍定課程廣廩餼敘品流  
人才蒸蒸日上而視學所至必進諸生勗以朱五子之書前  
後五六爲鄉試考官主會試者再不可以私干得人稱盛其  
課士遴才有如此者公旣晉吏部尙書以省銜出任總督乾  
隆三年在直隸捕蝗格通水道議屯種清佃租旂民稱便六  
年移節湖廣甫下車卽巡視苗疆跋涉奇險相其要害設營  
堡益弁兵俾寶靖城綏之間永永安堵若平反冤濫奉使河  
中則出十許人於獄皆數十年前奏當大辟待質未決者於  
直隸清苑囚則留之歐刀之下覆請得釋其恤民懇惻有如  
此者蓋公在雍正初猶七品官耳十餘年中位至侍郎末年  
以奏事失儀落職尋起爲河東鹽政



今上卽位以吏部侍郎

召還朝歷中外大位中間一撫

福建少躡卽起由副都御史累遷至今官凡四十餘年向使

公不遇

先帝及

今上之至仁至明則無以行其所學而非公積誠守正初終

如一卽亦何能取信於

至尊若是其專且从哉累授光祿大夫刑部尙書元配原夫

人贈一品夫人繼配張夫人見封一品父天繡公以上

至曾大父並贈如其官祖妣並贈如原夫人子多殤長

子太學生孝懿前卒次卽孝愉又次孝則女四人女孫二人

著有近思錄輯要春秋義等書餘多不存近有詩經補注若

干卷易解垂就而卒先是公再起爲副都御史

上命在上書房行走公喜謂二子曰吾衰年不堪以筋力效  
用今得從容畧閒與 皇子講習經義是誠吾盡心之地  
也尋請於

上作補注每一篇成請裁

上前經 硃筆刪潤者十之六七滿一歲書成稿具方略  
館乾隆十有九年十月十有七日葬於邑之喬家溝距縣五  
里銘曰

世儒講學有嘖其言維公身之乃見本原忠孝信義以終如  
始文繡膏粱匪求而至道闡斯光餘事文章高廣莊厚渾涵  
汪洋猥以謗劣見許援出諄諄擊蒙去華存實每憶斯言涕  
汗交集嗚呼傷哉星隕山頽

帝念不已禮備榮哀天予茲宅路人飲泣子孫雲來樵蘇跡

絕

光祿大夫禮部尙書吳文簡公神道碑 汪由敦

雍正十三年乙卯正月初九日 經筵講官禮部尙書青陽

吳公卒於位於時

天子震悼遣散秩大臣率侍衛奠茶酒命寮屬弔奠郊送歸

途所過有司兵弁護視其喪 賜祭葬如制謚曰文簡惟

公以老學宿望遭逢 聖朝起自蓬掖卽以詩翰受

知晚始策名躋顯仕典領文章出入 禁闥二十餘年食稽

古之報爲時宗工烏可以無銘按狀公諱襄字七雲號懸水

江南池州府青陽縣人五世祖諱某以子貴贈兵科給事中

高祖諱某歲貢生以子貴贈儒林郎曾祖諱某太學生祖諱

某庠生考諱某皆以公貴 贈如其官公生而穎異讀書目

數行下比長博綜載籍工詩古文尤精制舉業補博士弟子  
員試輒冠其曹稱大江南名諸生

聖祖仁皇帝親征噶爾丹學使者以朔漠蕩平賦課士公立  
就千言典瞻工麗使者擊節稱國士隨選拔入成均長洲韓  
公爲大司成負人倫鑒獨契賞公康熙乙酉

聖祖南巡諸生獻賦 屬車者召試

行在所公名在一等 命撫臣給帑金資送入都奉

旨分校歷代詩餘書竣澤州陳文貞公薦協纂他書無何丁  
太夫人憂服闋北上以書成敘勞當得縣令去先達多以館  
閣失人爲惜會

萬壽特開 恩科投牒就試聯捷成進士改庶吉士其時

公年五十有四癸乙未散館授編修戊戌充會試同考官教

習留京進士又分教庶吉士己亥入直武英殿辛丑四月  
特召赴熱河偕長洲何義門晉江陳對初兩學士同撰擬文  
字悉稱

上旨壬寅正月

賜廷臣年六十以上者宴公年六十有

二欣與

盛典獻詩紀其事是年冬

聖祖賓天奉

世宗憲皇帝命撰擬祭告

几筵諸大篇公自以詞臣受

知眷哀慟至深於齋次和

淚濡墨曲體

聖天子大孝攀慕至意每奏一篇未嘗不嗚咽感動謂能道

意中事自是被

眷逾渥雍正元年

命入直南書房

尋授左中允陞侍講提督順天學政時復設

日講起居注

官視學者例不列名

上特以授公公初涖學政距鄉試僅一月公先期繕稿以待  
比受印立檄行試事始不誤四府拔貢前學臣未及咨部部  
議持不便錄科公曰卽不選拔諸生庸不得與試耶請仍以  
生員入闈 恩詔廣額部限一年考畢公疏請未科試者

隨試增加已試者於歲試補行他若加八旂廩增及旦字號  
皆一體廣額視事四載正文體敦實學自以先正大家開導  
諸生腐陋爲之一洗所至留心民瘼敬陳畿南水利請設勸  
農使奏入竝蒙 俞可甲辰陞侍講學士乙巳轉侍讀學

士丙午擢內閣學士兼禮部侍郎充 經筵講官辛亥遷禮

部右侍郎長白山爲 本朝發祥地載在祀典遣官不能至

率望祀甯古塔將軍請於版山建享殿公引舜典禮望祭山

川之文參宋明壇側建設齋廳之制宜改享殿名爲望祭  
詔如所議各省條陳學校有不便輒揆事理駁奏諸所援據  
具得體要癸丑會試知貢舉別清夙弊規條寬簡士子便之  
四月晉禮部尙書冬奉 命兼攝都察院左都御史乙卯  
元旦慶賀公以七十以上大臣在 乾清門行禮卒之日入  
賀庠麟上瑞承 顧問以禪理叩擊公奏對圓通無碍晝  
漏移數刻始退旣退猶過同年友邸舍追敘疇昔言笑盡歡  
抵暮返寓與公子語夜分不休已忽倦若假寐者寤而索茗  
氣息頓微遂口授遺疏書竟端坐以逝比秋而

憲皇帝鼎成上賓矣公所居在九華山下九華有老僧行素  
高爲贈公所敬禮公之誕也候門僕恍惚見老僧者杖錫入  
後堂曰加酉公生比入山訪老僧則先一日圓寂矣嗚呼佛

氏來去因緣之義或疑其誕若公者則又何說公性淳厚樂  
易與人交無少長貴賤皆得其歡欵語移日見者忘爲達官  
鉅人汲引後進孜孜不倦獎賞多所成就著述詩書古文不  
下百卷應制之作典雅純正詞林中事有資討論者率以屬  
公先是充

三朝國史治河方略詩經集說彙纂纂修官及爲大僚充  
國史明史八旂志書諸館副總裁分撰國朝賢良傳兩充  
殿試讀卷官雍正元年賜第一區白銀四百兩

御書堂額曰老成端諒舉朝謂公足當之不愧其他如

賜予御書書籍及珍器衣裘食物不勝紀享年七十有五嗚  
呼清名榮仕耆年令終史冊所紀如公者詎多覩哉公元配  
陳氏明工部主事諱明晰曾孫女諱元會女諱贈宜人待



贈一品夫人賢明懿淑稱於門內早卒公不再娶至老不畜  
侍妾子三人長慶旂庠生先公兩月卒次慶祺康熙庚子舉  
人次兆雯康熙庚子舉人雍正甲辰進士翰林院編修女二  
人皆適名族孫四人某乾隆戊午舉人孫女六人公卒之幾  
年卜葬於某阡由敦爲諸生初來京師無一人知者惟公一  
見以斯文相許及與季君同館選於後進中荷公知契尤厚  
公薨而季君以神道之石屬銘由敦遜謝不敢當厯十餘年  
不已乃敢叙述梗概揭諸

賜塋公鬚眉談笑尙髣髴遇

諸毫楮問後之論儒臣宿德者其有所考云銘曰

蓮華九子秀挺嶙峋延陵世胄篤生偉人文成慧業金粟前  
身甘泉奏賦名震雲津秘閣簪毫承明校理萬軸濃香麝煤  
官紙俱奉西清迴翔金甌畿輔提衡星明太史迺登講筵迺

晉春官山龍黼黻色正芒寒名高燕許望峻歐韓旣長秩宗兼領臺端畫接頻仍便蕃渥眷甲第南金文羅寶扇老

成端亮

賜來深殿豈羨昔賢金蓮歸院番番黃髮耆碩

鴻儒夔龍事業炳耀六符倏騎箕尾雲路誰須

鼎成龍馭公殆先驅公在東墀棟梁是寄公返碧霄士林掩淚禮備哀榮豐碑矗矗協吉幽宮流光奕世

文華殿大學士尹文端公神道碑

袁枚

乾隆三十六年二月文華殿大學士尹公薨於位

天子震悼加贈太保諡文端崇祀賢良次年三月公子慶玉等扶柩葬於遼東遵公遺命墓勿爲碑其門下士袁枚泣而言曰古勲華之盛皆於臯夔之訐謏見之我國家治隆唐虞天生文端公熙

帝之載垂五十年四夷九州靡不延首景仰思有以頌其生平而公恭謹縝密手焚諫草言不及溫室樹至采於起居注及鐫於鎖鑰奚以昭

聖世之勲猷與明良一德之盛也

哉枚受業侍坐凡教誨所垂暨諸軍民屬吏所稱祝者恒志之弗敢忘庸鋪敘以聲於貞石或亦左氏所謂違而道者耶諸子曰唯乃撫其梗概而銘之曰公諱繼善字元長晚自號望山滿洲鑲黃旗人世居遼東父泰罷祭酒家居

世宗爲藩王祭長白山召與語悅之問有子仕乎曰第五子繼善舉京兆曰當令見我及公試禮部將謁雍邸而

聖祖崩

世宗卽皇帝位乃中止公亦登雍正元年進士引見

世宗喜曰汝卽尹泰子耶果大器也選入翰林而召祭

酒公爲工部侍郎尋遷東閣大學士時公已授侍講怡親王請爲記室

上許之天寒衣羊裘從王王憐其貧賜青狐一襲奏署戶部貴州司郎中當是時廣東總督孔毓珣與巡撫楊文乾不相中肇高廉道王士俊者楊所薦也伺楊入覲劾王下獄公承命往鞫得其情

世宗深嘉之未復命授廣東按察使甫抵任遷副總河未半年遷江蘇巡撫仍兼河務事時雍正六年也江蘇漕政玩弊公奏衛丁州縣費各有需嗣後請米一石收費六分先給官丁使無不足然後一裁以法其州縣收漕淋尖踢斛花邊咸有禁上下肅然迄公去任無或犯者餘非公家之利應存縣庫又奏撤水師營而增沙船巡海又奏鹽院伊拉齊不

法請禡職擒治

世宗悉允所請歡聲接於衢七年署河道總督九年署江南總督未一年雲南元江苗反調雲貴廣西三省總督公白哲少鬚麋豐頤大口聲清揚遠聞著體紅癍如硃砂鮮目秀而慈長寸許釋褐五年卽膺節鉞年裁三十餘常一月間兼攝將軍提督巡撫河漕鹽政上下兩江學政等官九印彪列簿書填委而公判決恢然無瘁容亦無驕色猶與諸生論文課詩以故民相傳折服聞呼騶過爭欣欣然走一二里追輿望影以爲天人其督南河也

上命開天然壩公不可適浙督李衛入 覲過清江傳

旨嚴飭且云衛已奏明黃水小開固毋妨公覆奏李衛不問河身之深淺而但問河水之大小非知河者也倘河淺壩開

宣流太過則湖水弱難以敵黃之強方草奏時幕中客齊爲公危有治裝求去者公不爲動

世宗喜曰卿有定見朕復何憂輟

御衣冠賜公而加公

太子太保其調雲貴入觀也江南災河東總督田文鏡欲夸所屬之豐請酒東粟助賑按察使唐綏祖密奏東省亦災粟宜留

世宗問公公奏如綏祖言

世宗曰如卿言山東誠災第綏祖田文鏡所薦不宜異議公曰臣聞古人有申公憲以報私恩者若臣作田文鏡只知感愧不知嫌怨時唐禍幾不測以公解得免而公初不識唐也公旣到滇知前督高其倬雖受譴而老成有識乃虛已諮詢高亦感公意備告款要遂率總兵楊國華董芳等分路進兵

破之擒其魁老常小等元江平

今上登極之二年補刑部尙書四年教習庶吉士五年總督川陝八年江南災調兩江十三年調廣東不果補吏部尙書協辦大學士金川用兵乘傳與忠勇公傅恒詣軍前受降畢仍督川陝十六年調兩江十九年河決

命督南河河平

命視師伊犁半途追還仍督兩江二十九年年七十

上召來京師

賜譙於第賞賚無算拜文華殿大學士仍

辦總督次年還

朝相

天子七年薨公毅而能擾機牙四應

上深知之凡糾紛盤錯事他大臣能了者不命公既命公則皆棋危柁險萬口禁聲人方怯公無下手處而公紆徐料量如置器平地靡不帖妥又如東風吹枯頃刻改色凡一督雲

貴三督川陝四督江南而在江南尤久前後三十餘年民相與父馴子伏每聞公來老幼奔呼相賀公亦視江南如故鄉渡黃河輒心開臨入閤時吏民環送悲號公不覺悽愴傷懷過村橋野寺必流連小住慰勞送者不侵官不矯俗不畜怨不通苞苴將有張施必集監司以下屬曰我意如是諸君必駁我我解說則再駁之使萬無可駁而後可行勿以總督語有所因循也以故公所行鮮有敗事所理大獄雍正間江蘇積欠四百餘萬乾隆間盧魯生偽稿及各郡叛逆邪教等案皆株引萬千而公部居別白除苛解嬈不妄戮一人先是十六年

天子南巡總督黃公盱衡厲色俱張辦二十二年至三十年公三迎



鑾熙熙然民不知徭役供張亦辦人以是服公之敏也公清談干雲而尤長奏對

世宗嘗詔公曰汝知有督撫中當學者乎李衛鄂爾泰田文鏡是矣公應聲曰李衛臣學其勇不學其粗田文鏡臣學其勤不學其刻鄂爾泰大局好宜學處多然臣亦不學其愎也江蘇布政使蘇其寬妄奏司胥侵厯年正供自矜嚴察公偏劾其寬縱之曰某既知庫虧百萬而不能科別窮治何耶

上意釋命大學士劉統勳會同覆按事果虛俗傳公貌類佛而不喜佛法聞人才後進則傾衿推轂提訓孳孳每公餘一卷一燈如老諸生寒暑勿輟詩成喜人吟聽至頓挫處手爲拍張或半字未安必嚴改乃已以故清詞麗句雖專門名家自愧不如

上嘗下詔曰本朝滿洲科目惟鄂爾泰尹繼善二人嗚呼榮哉故事宰相抵任在翰林衙門公入相時所坐處卽公先人之位公母徐氏側室也以公貴封一品夫人公側室張氏以第二女爲皇八子妃亦封一品夫人充丙戌會試總裁先一年而降旨皆異數也公本姓章佳氏先娶郎氏再娶鄂氏俱封夫人子某某銘曰

一事未行歡聲雷鳴問厥所由相感以誠一令裁布趨迎滿路我知其故信之有素大哉夫子金粹玉溫仇怨低首菴戎扶輪五行中土四時中春惟其育物所以歸仁公嘗訓人入如履地不留有餘鮮不顛躓人亦指公公如大樹安寢其下使人可據貴且彌恭耄乃益聰乾乾日稷扶我皇風十事要說姚崇忠愛公欲云云探懷有待元齡遺表諫征高麗公

竟生前抗顏陳詞易寶猶視殘編斷紙曰性所耽惟文與史  
七十七年大星歸矣有子十三鄧家金紫罔不束脩敦詩說  
禮遼水湯湯繞公墓堂江水悠悠望公來遊二水之間知公  
俱到驚我銘詩以佐伐考

湖海文傳卷五十

青浦王 昶德甫輯

碑

福建巡撫敏惠潘公神道碑

沈大成

特贈光祿大夫巡撫福建副都御史河陽敏惠公葬在常州陽湖縣定東鄉姚官巷之原今大學士同郡劉公實爲文以藏諸墓初公之薨

天子眷念封疆勞績

特予祭葬易名晉階列祀賢良用

一品例

恩封三世粵自癸酉公葬至今乙酉十有三年

聖駕南巡必蒙

恩遣大臣卽家致祭優渥之典在古希

邁茲將有事墓隧之刻公之子振瑩振煥來告曰以墓前石相累此先大夫易簣之言也今者三拜 盛典光賁泉壤凡

所以樹墓上而垂來葉者不可再緩敢申遺命以請余辱交  
公久感臨沒之屬又以賢嗣之勿忍忘也乃不辭謹爲序其  
實而繫以銘序曰公諱思桀字絜方別號補堂常州陽湖人  
其先出宋武惠公有判常州而卒官者爲繼周公始占籍宜  
興明洪武初徙郡城曾祖諱毓靈曾祖妣吳氏祖諱禹謨祖  
妣沈氏考諱恣漸天長學諸生妣陸氏潘在郡城者累世隱  
不顯後以公貴自祖以下皆 贈如其官妣皆 贈夫人公  
勤學慨然有志於用世早歲食餼雍正癸卯舉於鄉甲辰成  
進士選庶吉士明年改刑部陝西司主事丁家艱歸起復補  
主事升貴州司員外郎充己酉順天鄉試庚戌會試同考官  
轉現審司郎中出守廣東之南雄考最擢海南兵備道調糧  
驛道就拜按察使遷浙江布政使奉 命巡撫安徽移鎮

福建居五年薨於位此公之所履也公性敏決明法律練習吏事力持大體而汲汲以宣朝廷德意經國澤民爲務故所至辦治而輿望歸之其在西曹讞獄常至夜分飢則探懷餅瀹水而食每隨尚書入奏事

先帝嘉之在南雄大水將敗城公禱神危橋俎未徹而橋崩露宿埤堦胥吏率縛筏濟溺者在瓊深入五指山安輯黎衆劾一帥一守之殘瓊人者洎秉塲臬飭綱紀端風俗摘貪蠹鉏豪猾所部肅然而理冤獄尤多會久旱奸民數百爲羣入市強取米公時方疾起坐堂皇立捕數十人至痛杖荷校以徇守藩時甲子浙東大水壞田廬漂人畜無算公出臨錢塘江收流棺瘞浮尸發運銀粟分往賑恤其秋蕭山民凶凶渡江公曰民飢當哺鬲則亂民也嚴懲之自是迄麥登無一人

敢譁者其撫安徽也當河決淮淝之後鳳潁泗皆災公前後請庫廩百萬有奇拜疏親行督賑冒風渡洪澤湖舟幾覆不爲動歸奏調劑三事曰課農桑疏溝洫稽流移其言清洫尤切得旨俞允將次第舉行而拜移聞之命行矣聞

爲巖疆庶政繁委民情囂獷相尙以鬪訟盜匪數起公廉得其主名髮櫛而草薶之盡見官屬夜披案牘旱則步禱潦則按卹又以農隙巡行海防周閱戰艦朔望入書院與諸生講說經義如是者歲以爲常勞積疾作而不少止也在閩四年餘一朝京師六蒙召對中外知

上倚任益專早晚期公之枋用矣公之所蒞以水利爲農田本嘗欲大治餘杭之南湖上虞之夏蓋湖壽州之安豐塘上江之漕湖池又茨沙灘諸河繪圖商功皇然爲斯民綢繆牖

戶計皆以離局中輟惟修築寧德之東湖開良田萬畝復福  
州之西湖溉其旁數千頃幸得竣居恒與客言嘗引以爲憾  
也公爲人重厚寡言笑未嘗見喜愠之色臨大事能斷恤吏  
民若一體處公務若營其家愛士育材惟恐不及於世間嗜  
好泊如也故臯復之夕賓哭於館吏哭於次士哭於塾民哭  
於塗卒哭於伍其感人之心如此夫以

天子之嚮用海內之慕仰喁喁者方跂以爲相而公齒位遽  
訖於是豈脩短之數不繫於人耶公治諸經尤邃於易獨能  
探荀虞之旨嘗謂後世知有漢學者賴李鼎祚易解存耳自  
建節卽不攜眷之官公餘日閱注疏及徐氏經解箋釋塗乙  
出入一童抱畢牘自隨有得卽疏之每語學者曰學必求有  
用凡象緯方輿厯竿鍾律水利農政何事不當留心又曰士



君子當以砥行立身爲要若詞章撰著抑末耳故自去翰林  
益講求經濟實學雖以大成之燕陋一鐙熒熒相與考訂論  
辨反復如老書生其虛懷好學有古人所難者公生於康熙  
三十四年正月十九日沒於乾隆十七年二月十七日享年  
五十有八配陸氏封夫人長振瑩見署來安知縣次振煥  
太學生來速文者也俱陸夫人出女一適同里錢卣側室沈  
氏出撫女二一適江陰曹姓一適江都許式紹孫一松筠邑  
諸生公起寒素幼從師讀書嘗至市易薪米或遇雨雪衣履  
盡濕逮後通籍洗手奉公終身非其賓客食不重肉衣或澣  
紵丁卯以皖撫監臨江南鄉試日進供給視舊減過半鄉人  
榮公而彌佩其清節也公之宅行具詳劉公所作墓志中余  
惟就素所稔知者書之竊歎公之長德鉅望中年奄逝未究

其用世之志爲天下惜也銘曰

晉陵之墟厥生偉人蓄極迺宣其祉宜蕃烈烈潘公爲時名  
臣原本六籍蔚爲經綸清勤果恪立朝當官于皖于浙于  
粵于閩甘棠蔽芾謳頌在民公之守郡召信杜詩公之建節  
韓滉孔戣

天子之毗儒者之師台輔之望方鎮之規胡奪之年未究其  
施瞻彼峴山今古同悲迹公所行無愧三立觀之門內克諧  
而翕中外嫺黨亦睦以輯不遺簪履不寒車空推其惻怛仁  
煦幽蟄掩骼埋胔萬鬼感泣緬公之存任兼股肱逮公之逝  
禮備哀榮

天子省方三蒞

龍靈

龍章牲帛崇于大烝刻詩豐

碑惟覈斯徵子子孫孫善繼善承

資政大夫工部侍郎范公紳道碑

陸燿

乾隆辛巳之歲恭逢

聖母皇太后七旬萬壽

上命文武廷臣及予告在籍年七十以上者各九人賜游香山製九老詩以寵之則資政大夫工部侍郎松巖范公與焉蓋公自丙寅蒙

恩致仕至是以

慶典來朝獲廁耆英

之會朝論榮之越六年丙戌十二月有司以公卒聞

諭

祭如例以某年月日葬公於木瀆之阡公諱璨字電文一字

約軒其曰松巖者以

上賜公松巖樂志額因以爲號也系出朱文正公長子監簿公純佑之後十一傳至從源徙麻源九曲里是爲公始遷之祖州同知能彥公之考也國子監生必才公之祖也府學生

允龍公之曾祖也祖考皆贈資政大夫河南布政使妣皆夫人公登康熙癸巳鄉薦雍正甲辰進士改庶吉士以人才薦知大興縣擢知鄧州陞知萊州安慶江甯等府分巡廬鳳潁道河南直隸布政使巡撫湖北安徽入爲都察院副都御史工部侍郎在大興日部民阿青恣橫一日方理堂事突入攫人公曰鼠輩敢爾縣令尙可爲哉卽關署扉捕之鞠其奸狀境內肅然縣有隱糧一案公白京兆發之藩司不悅方以他事去公在廷有白公寃者特擢河南鄧州知州鄧旁邑巨盜張連弩力絕人吏不敢捕公召瞽目退役以計擒而致之旁邑坐弛再脫公復以計擒之副使廬鳳時境有飛蝗公禱於神自卽鄉農撲捕忽有蟲似蝗而黑雜處蝗中三日嚼蝗爲盡咸謂公誠感所致嘗自爲捕盜捕蝗二記志其事其自

楚移皖或挾千金追送江干麾之不去公慮僣從爲奸自坐  
鷁首諭之視其舟去遠乃已所聘廬鳳泗滁連歲災祲公念  
新舊並徵民力必困分年帶徵民賴蘇息又以江表重地武  
備宜急日坐箭道分番練習一時營伍皆嫻於藝方是時皆  
以公敏歷有年行駸駸大用矣果入參臺憲晉佐司空公感  
激遭逢益圖自效如弛富戶固積之禁酌命盜處分之條核  
下江收漕之制有見輒陳不敢緘隱旋以兩親尙在淺土特  
疏陳請遂得蒙恩卜葬並許歸田自公解組之後惟以  
經書督課諸孫不問外事中間詣闕祝嘏者再恭迓  
靈輅者三天章宸翰藤杖如意文綺佩囊之賜稠  
疊里門不可勝紀居平益以盛滿爲戒潔清之操晚節彌勵  
菜羹蔬食不異寒素益仕宦京外者二十餘年退養林泉者

亦二十餘年公既貴顯讓宅於從父兄弟而自卜居於吳興之南潯其卒之年距生於康熙庚申享年八十有七配孫夫人子二人儀薰國子監生莢貢生皆先公卒孫三人塤城塏皆國子生予於公爲鄉後學塤又姻也以公隧道之文來請因敘其世次歷官行誼而系以銘銘曰

范由宋啟族爲吳望監簿子孫麻源再創公繼厥聲於宗有允進樹勲猷退懷廉讓始鏃詞鋒旋馴利器屈服市魁齟齬大吏治不爲武盜以警致歲不能災蟲以類噬建牙楚幕弭節皖城臣心如水却餽逆行誰逼飢餒公寬其征誰弛什伍公練其兵旣長諫垣游司邦士剔弊釐奸卽事條舉業著鼎鐘榮辭嚮組潯溪之濱來歸啟宇普天同歡

聖母萬壽公再趨

朝龐眉皓首

帝詔耆成陟遊巖阜追媿唐賢得公而九自還初服三迓  
鑾輿便蕃 寵錫照耀衡閭公戒驕溢益慎德隅閉門卻  
埽樂此桑榆溯公名德累世相承衣冠蕃衍逮公復興園以  
義高山以 賜稱幽堂對啟銘示昆仍

經筵講官兵部尚書彭公神道碑

袁枚

乾隆四十九年六月兵部尚書彭公薨於里第一時士大夫  
走位相弔泣且歎曰

先皇帝老臣盡矣存者惟嵇相國爲先輩而彭公科尤先海  
內望之如晨星孤月倘假一二年重宴鹿鳴瓊林豈非

熙朝盛事而天偏靳之悲夫然公之清節重望恩榮壽考於  
古爲稀勒之貞珉備 國史之採不可廢也其同館後進袁  
枚受公知五十年爲按其狀而銘之曰公諱啟豐字翰文應

鄉舉時芝生庭中因自號芝庭先世由江西遷蘇郡之長洲  
祖定求康熙丙辰會殿試俱第一父正乾考授州同知三  
世皆以公貴誥贈光祿大夫吏部右侍郎公貌清羸長不  
踰中人而風骨珊珊然如鷺飛鶴翔凌風欲去雍正三年舉於  
鄉四年會試第一殿試亦第一大學士張文和公奏科名  
與而祖同

世宗喜卽召入南書房七年充河南鄉試副考官時未散館  
而有是命皆異數也十三年遷左春坊左中允

今上登極之元年遷侍講累遷至侍讀學士通政司左通政  
吏兵刑三部侍郎尋授兵部尙書充經筵講官

兩聖人知公廉明能文章凡掄才大典倚公如金鑑命  
校順天鄉會試者三主直省試者七視學政者二經歷滇南



中州江右山左浙西輜軒所臨庶士歡迓其他讀卷殿上  
及閱回避拔貢教習朝考召試諸卷皆疊次委任連綿不斷  
公亦飭躬齋心克與

上意相副從江西還奏所過宿州有司賑災不實又奏請勅  
各省學臣見督撫母卑諂應遵會典儀注

上是之在浙時奏官河宜開濬漕費宜遵舊制毋浮收本省  
官出巡應額限役夫毋過十名任兵部時奏武職銓補遲速  
不均宜與卓異官均以雙單月輪班間用奏馳驛官奉使者  
有廩給口糧而夫役俱向驛站借雇慮開多索濫應之漸宜  
停例支改一馬三夫

上皆可其奏發部議施行當是時

上方需用公適有同部兩侍郎不相中造蜚語聞

上引公爲證

上問公公對未聞

上疑有私降爲侍郎越二年以原官休於家先是公乞養歸爲娛奉太夫人故簷山濬池蒔花竹極園林之勝至是再歸山水益清幽樹益茂公擁萬卷嘯哦其間雖大耄聰強不衰或春秋佳晨出遊石湖寒山士女皆知兩朝元老擁觀塞路初公侍內廷時

世宗賞大臣福字偶未及公

特手書以賜侍

今上泛舟賞花釣魚

命和詩至二百餘首所

賜珍

玩無算祝

皇太后萬壽與九老會圖形中禁金川蕩平公迎

駕山東進凱歌

恩復尙書銜與宴在江南三次迎

鑾皆召見

溫諭四十九年公迎

駕跪龍泉莊

上遥望見卽

命侍衛扶起

命秋冬北上與千叟宴

公方感

上恩修安車欲行未及期以無疾終年八十四性峭直稍不可於意卽形詞色然過後輒不省慊慊自下遇布衣文學之士皆抗禮與鈞枚弱冠入都卽奇賞之聞其入穀特呼車往賀主司得人晚年猶端書細字往來唱和尤密常語人曰袁君非徒詩文佳也聽其議論如魯公書徹透紙背其見知如此妻朱氏諡封一品夫人妾程孺人子五人長紹謙山東桃源同知次紹觀翰林侍讀學士次紹咸增廣生次紹升丁丑進士次紹濟尙幼女三人其一適常州學士莊公培因亦甲戌狀元也孫十二人皆有科名曾孫六人銘曰

庭實九獻特達圭璋簫韶九成來儀鳳凰天生彭公爲世休  
祥履星辰上立日月旁

帝昇玉尺東度西量抒所蘊畜施于爲政獬豸爽鳩屢拜  
寵命周官司馬權重中樞公靜鎮之四海宴如

帝謂古賢七十懸車卿年已屆可以歸歟公拜稽首

聖恩優老臣願歸田咏歌天保都人羨公祖餞盈道一十七  
年烟雲花鳥臣請

主安

帝問卿好以其餘閒爲書院師胡瑗孫復歐范優爲以其餘  
福蔭及孫曾玉堂蕊榜綿綿繼繼齊門之外新塘之東百尺  
華表萬古清風

太子太保光祿大夫兵部尙書都察院右都御史總督

漕運楊勤懋公神道碑

魯九臯

國家漕東南之粟上輸神倉聯鉅艦以載凡六千九百六十有九艘各有運丁丁所僱募舵工水手之屬不下數萬人艘入運河沿河左右待募牽纜之夫亦不下數萬人眾事繁於是各直省並設衛所員弁領運以糾偷惰以察奸慝而必以文武威風知大體可敬信之大臣總其事乾隆二十二年正月清江楊勤懋公以前禮部尚書奉特旨轉兵部尚書補授漕運總督公既視事諮訪利病爬羅剔抉興之革之與眾同欲慮漕運或有阻滯時與河臣協謀疏濬以時畜洩俾其通達

上嘉獎焉而公淡泊寧靜化導運官撫卹疲困靡有私求在任十二年凡糧艘所過安靜不擾沿河居民往來行旅無不

帖然三十三年冬十二月朔薨於位

上聞震悼

賜祭葬如禮

特命予諡凡飾終之典罔

不備具嗚呼公之忠誠結

主知

聖天子之知人善任使可謂千載一時何其盛也明年十二

月歸葬日中山祖塋又二年乾隆辛卯

恩科會試公之

孫楫珩成進士出公之行狀及其墓誌以示同年生某俾撰

辭以銘其墓道之碑某後生始進未能窺測我公公忠體

國之誠於萬一笑敢妄有稱述再拜稽首以辭楫珩曰先大

父知子夙愛子文章子其勿辭某再拜受命謹按公狀公諱

錫紱字方來號蘭畹江西清江人也曾祖諱相輔祖諱文燾

父諱增瑛三代並以公貴

誥贈光祿大夫如公官階曾祖

妣聶氏祖妣張氏妣張氏並 誥贈一品夫人公生而穎異  
幼卽端重若成人稍長肆力於學尤篤嗜宋儒書務求所學  
有俾實用雍正五年成進士初任爲吏部考功司主事陞員  
外郎中皆在吏部轉貴州道監察御史由御史出任廣東肇  
羅道

今上登極元年十月陞署廣西布政使越一年實授六年陞  
廣西巡撫九年入爲禮部侍郎十年又出任湖南巡撫十三  
年丁父憂去任十五年服闋補刑部侍郎仍出湖南巡撫十  
六年丁母憂十八年服闋仍補授湖南巡撫未到任陞都察  
院左都御史十九年署吏部尙書二十年二月仍出署湖南  
巡撫其年冬入爲禮部尙書二十一年冬又出署山東巡撫  
明年春正月遂總督漕運事二十三年晉太子少師二十八

年又蒙

恩加太子太保公既少讀書卽講求實用及在

官試其所學學日以顯故所至內外皆有實政初仕吏部時

明習條例老吏不能欺高安朱文端公深器之其出而治外

也清心寡欲正己率屬汲汲以興水利廣積貯敦學校宏教

化爲事在肇羅道任歲巡視瀕海之田修築圍基絕其水患

在廣西屢平土苗之變並勦捕黔省逆苗而審知猺獞苗民

愚而嗜利其黠者動以挖窖書符煽惑聚眾嚴飭所屬多方

緝捕絕其根株更令實力行保甲法以靖奸匪凡逆苗田產

歸官卽令苗民承種收其租以資積貯借給貧苗旣勦且撫

安集有方苗民咸化屬吏或以人參饋者公怒却之入告

上曰真不愧四知者湖南民好健訟者習邪教公皆一一嚴

懲禁之又以湖南產穀之鄉鄰省皆賴以接濟蓄積尤宜加



厚其溢額倉穀或調支協撥卽飭所在隨時買補而長沙岳  
州常德澧州諸境濱臨洞庭沿湖田廬全資堤垸護衛例於  
每歲秋冬督民修築然多視爲故事豪家蠹胥包攬侵扣工  
力不均推諉延誤公嚴飭有司委熟諳堤工之員辦治而輕  
舟減從時巡視之察其勤惰予以勸懲堤工之成旣堅且厚  
彌望屹立民以無虞公凡三蒞湖南父老歡迎如慈父母其  
政績之大者如此其細者不勝書也公久任封疆敷歷中外  
三十餘年凡所陳奏悉協大體而尤關國計民生之大者  
在湖南日以各省水利久廢愚民不知遠慮數畝之塘往往  
培土爲田一遇旱乾卽他膏腴都成棄壤請飭各省督撫凡  
有陂塘處所嚴禁改墾  
上詔行之又以湖南每歲採木有司至苗地視其所有木輒

籍記之而賤價勒買商木運至江南私賣請自後商木憑牙  
行採買不得官爲交易其在苗地者州縣官爲審問聽民願  
賣者買之運過辰關按驗乃行遂著爲例其在漕任最久數  
陳亦最多

上皆允準施行是以漕政肅清軍民胥賴公旣薨繼公任漕  
政者

上皆以遵公約束

命之所訂漕運全書雲門黃公署漕

督時表上焉嗚呼公真可謂不負所學者矣公爲人寬宏樂  
易待人以恕而自守極嚴平生於聲色貨利一無所好而以  
人才爲性命偏長薄藝靡不記錄尤加意敦崇正學之士獎  
誘激勸如恐不及居家孝友惇睦化其宗族鄉黨皆爲仁讓  
教子弟一以禮法綜公生平自始學至宦成居官居家視唐

權文公宋范文正呂正獻二公靡有愧焉某未及見公猥以  
文字辱公之知深懼弗稱承林珎命謹著其風節之大者於  
阡而系以銘若其子姓詳於誌其所著述懸於家塾傳於學  
士大夫之口者可考而知也銘曰

聖主御世賢臣得位維勤懋公洪普厥施初出而仕見知正  
人始終一節不辱其身

天子常稱有體有用

主知旣隆臣節增重醇儒之學純臣之心不懈于位終日欽  
欽淡泊寧靜其稟也正學以成之爰定厥命虛阜之高章水  
之清公生其間山川之靈匪公鍾靈惟山及水乾坤正氣公  
萃厥美粹美在躬車服以庸盛朝用人惟德之崇維公之  
德世可法則遺命子孫竭誠報國有子有孫世受國恩

傳公之教邇久彌敦公教所垂豈惟孫子凡厥志士孰不仰企企公之教仰公之功齊魯楚粵慶流無窮楚粵齊魯公德所溥公德之溥功由

聖主

聖主用公公績乃彰於萬斯年視此銘章

太子太保光祿大夫兵部尙書總督河南河東河道提督軍務謚愨敬張公神道碑

陳兆崙

河中儀封張氏清恪公諱伯行康熙朝仕歷江南福建巡撫內擢侍郎以廉直名海內

聖祖仁皇帝嘗稱爲天下第一清官其仲子師載字又渠號愚齋初得官 陛見

先帝指示宰臣曰此張伯行子好司官

今上眷遇益隆每

召見輒詢及隨父任時事

天容

溫霽

賞賜優渥公故以報

國活民爲心用是益感激

奮勉懼有玷缺爲名父羞

乾隆甲申以北河督卒於位年六

十有九公由丁酉鄉舉得一品蔭補戶部員外郎雍正元年

出授知揚州府值揚州歲飢散賑而高郵湖西之民緣被災

分數稍輕不得與公行部至其地見道旁人多骨立待盡大

驚召長吏詰責隨請於上官不待報而廩之凡活男婦數千

口江都芒稻聞爲淮黃高寶諸河入江之關鍵所司貪商人

餌惟知蓄水爲運鹽地藉口必奉巖使令乃開會夏潦暴漲

低田盡淹公訪知運鹽須水六七尺而旣過其半遂單騎馳

往督役啟聞輒啟四板水暢出甚疾仍艤舟宿其旁明旦田

皆涸出然後走白巖使使者大恚責公專公謝曰知府信有

讐矣第拯溺不淹刻必預請而後行如此萬家烟火何後具  
文上大府請歸府轄許之芒稻間之屬府啟閣自此始公雖  
隨清恪公外任久晨夕唯讀父書及研精宋五子之學不與  
吏事尤於水利絕少見聞乃其出守初政卽已可觀如此故  
知才智由惻惻以出而其一生周歷中外顯職遂與河務相  
終始豈非冥冥中有意篤生爲盛朝宣力者歟自知府遷  
秩兩任河庫道河庫掌管鑰不任功過向爲美官公以才爲  
前後督臣所倚信輒委辦險要大功以故於河務淺熟悉乾  
隆十年遷江蘇按察使未任調江西尋內遷右通政明年七  
月由宗人府丞擢倉場侍郎命閱視天津河道旋以侍  
郎出副江南河督十有六年

上南巡接

駕道授江安巡撫仍協理南河事明年秋充

省試監臨在闕中而河溢二閘徐州被衝公與文定高公並  
視職在工贖罪又二年放歸丙子起爲兵部侍郎五月遷尙  
書總督漕務丁丑正月調今任時山東孫工決口賈舶漕艘  
如泛大海中公冒風雪宿河岸燈熒熒達曙如此閱冬春疏  
築始完公嘗言河中水勢土性與江南異兩岸相距寬宜多  
挑引河以殺險土多浮沙宜厚培客土以實虛自此由濟寧  
治所底開封歲往來如織而公心力亦瘁於是矣先是乾隆  
三年在河庫道任伯兄某病故原籍而王母太夫人王在堂  
遂尅期告養上官固留不可前此雍正末河督文敏稽公母  
卒蒙在任守制之命將具摺固請終喪衆以違旨  
獲罪爲疑公慨然進曰公父孝母節門望非常患請之不力  
耳何禍之觸文敏謝曰謹受教其在江西嚴無故遷葬之禁

行連坐法薄俗竟革撫江安二年多偏災皆據實上聞請恤  
全活甚眾痛懲匿名訐告時習以靖地方益資孝以事君者  
不敢惡於人因之宣德達情而澤流百姓亦固其所凡此皆  
清恪公之教也公平生治水方略有著書藏於家其隨時措  
置條理及一切治行已具諸城相國志中而長君景渭之子  
承重裕穀及次君景沆又次後伯兄者曰琦復合辭遣信詣  
余丐以崖略揭之碑銘曰

禹迹旣湮治河孔艱上策難行在漢已然或議棄地填廬蕩  
焉匪徒眾譁於心奚安意惟深刷去沙是急廣開支港以通  
其塞於末求本此計猶得增卑培薄救時之爲爲之務實亦  
大有裨毋忽蟻穴庶屹金堤惟公任勞南北周遭保障千里  
通行萬艘清恪有訓毫毛毋競只此俸錢無慚見



聖家風清白如秉繼震鬻產奉公破家積行  
帝鑒其誠謚曰愨敬爰賜祭葬松楸輝映哀亦增榮善斯衍  
慶樹碣道旁永爲世鏡

湖海文傳卷五十

湖海文傳卷五十一

青浦王昶德甫輯

墓表 墓碣

邵念魯先生墓表

朱筠

有明餘姚王文成公講致良知之學卒以功業顯著有效於  
是門弟子滿天下江西泰州龍谿竝述學案傳授著錄者輒  
數百人輻輳馳騁或不軌師說爲訛議於世而同里傳其學  
以醇謹稱最者曰徐愛曰仁錢德洪緒山聞人詮邦正胡瀚  
今山後少傳者惟德洪傳沈國模求如國模傳韓孔當遺韓  
邵曾可魯公曾可生貞顯字鶴閒貞顯生廷采字允斯又字  
念魯學者所稱念魯先生也鼎革之初諸老殂喪先生巋然  
承絕業於荒江斥海之濱嘗西北遊走潼關思有所用退而

老死以古文詞傳於其家死於今六十年姓名不出於鄉黨  
學者罕能道之而遺書將墜筠及門會稽章學誠篤好其文  
數爲筠感激言之乾隆辛卯冬先生之親同姓諸孫晉涵來  
謁筠于太平使院爲筠言先生始末詳具且曰先生諸孫先  
益先觀最賢思欲張大先生之行與文不幸先後死先益嘗  
改葬先生於縣九壘山墓道之石未有表者敢狀以請筠故  
無所見聞於先生然心知晉涵論君子也不敢辭按狀先  
生幼失母少長察察用父呵自斂從羣兒戲爲白打祖母孫  
戒之嚮學九歲讀史卽操槩爲徐達常遇春傳有法祖自外  
歸偶舉宋儒語語先生先生興曰其人安往耶願得而事之  
祖以爲有志卽爲具衣冠送之姚江書院姚江書院者在半  
隸崇正初縣人設以爲講學地也亂廢韓孔當率諸人復之

是時沈國模年八十矣尙在歲必一再至爲諸生設講先生  
立墻下聽久之執所業尙書前曰孩提不學不慮堯舜不思  
不勉同乎國模歎曰孺子知良知矣能敬以恕吾何加焉自  
是從孔當受業徐景范文亦者韓門高弟子也比見先生歎  
曰吾弗如邵子先生初讀傳習錄無所得旣而讀劉宗周人  
譜曰善乎吾知學王氏學者所始事矣年二十爲縣學生獨  
耻爲應舉之文人則讀古書出則古衣冠行市中未嘗旁視  
人傳以爲笑久之居祖祖母及父憂戒家人勿召僧七七曰  
陳梵誦經營窻窰必誠必信一慟盡哀鄉之前輩僉曰邵氏  
子善喪笑者愧之當是時書院諸先生相次沒諸生散去景  
范舉鄉試第一計偕京師卒先生獨行抱遺書守其師說而  
不變然貧無以自存走嘉興依故人課童子給食或有號稱

講學用私憾與王文成爲難者方負重名其徒陳鏜馬彭數造先生相辨難不能屈則歎曰吾哀若所學誠學鄉人之學而已先生應曰若尙不知毀日月者之喪明自哀不暇而暇吾哀耶居數年一與施博論學於放鶴洲先生曰天泉四言陽明原本無極之說儒也龍谿浸淫無生之旨釋也不得以彼病此博肅拜曰博老矣惟吾子崇尚正學自愛河間李塈貽書論明儒同異先生答曰致良知者主誠意陽明而後願學哉山其自信如此初吏部侍郎宛平孫承澤大學士孝感熊賜履先後以闢王氏學爲己任朝野之士譁然從之相與牽引詆訶以文成爲異端學者從事四子書又以能毀王氏學爲有功於章句集註庸俗羣師一談不破先生固疾之以爲是不足辨顧在力行耳從同邑黃宗羲問乾鑿度算法會

稽董瑒受陣圖保定王正中學西歷將軍施琅征臺灣過西  
湖遭先生相與縱談沿海要害琅奇之請與俱北謝不行閒  
遊鎮江與梁化鳳部將講坐作擊刺之法一月而盡之淮安  
從防河卒問河淮離合狀北入河南訪黃流故道西走窺潼  
關喟然曰土則古所耕也而水利亡矣奈何曾歲卒已知黃  
岡韋鍾藻建姚江書院於縣南博訪有紹文成之學者乃以  
禮幣致先生先一日戒眾厥明諸子畢至知縣偕教諭訓導  
至弟子迎於門外揖至階先生出泣階知縣升階揖先生揖  
教諭訓導次及諸弟子皆揖入釋菜於先賢如禮出卽講堂  
揖坐先生南向知縣西向教諭訓導東向弟子俟於階童子  
謁詩闕先生爲講易艮卦知縣顧諸弟子曰先生哉先生哉  
旣罷縣之父老喜曰數十年今見此也丙戌至山東戊子入

京師商邱宋至鄞萬經欲招之與一統志館先生謝曰老矣  
遂歸康熙五十年辛卯在會稽居外家六月病革作遺訓卒  
先生生順治五年戊子卒年六十四先生貌豐目有光紵袍  
布履門庭潔如居室必正坐飲酒數升不亂酒酣以往談忠  
孝事人人感動平生篤於三黨養老姑終其身從弟廷英數  
喜言祝蠶之術固乞先生束脯所入行賈輒喪之弗問也友  
教陶家堰隣婦誦聲數出於柵聞邵先生過數止一年而改  
數過道墟章氏主人設食主婦聞之切肉必方器必再三拭  
乃敢進鄉里童子遭於道必拱手立然士之爲俗學者輒貌  
敬之而迂先生竟莫肯傳其學先生少作觀心錄一卷宗義  
規之曰無實者弗爲先生輒燬之又撰明史論百篇示景范  
景范曰未有無紀傳而論贊作者先生欲然謝不敏先生旣

遊倦無所遇私念師友淵源之傳懼及身而卽斬也乃思托  
著述以自見以爲琦淹功微金許言絕於鑠文成立德以揭  
大任良知曰伊孟出蠶午魚爛執心辨舌作陽明王子傳粵  
神宗朝異學披猖意心之主惟戴山懋功祇悔而復藥羣髡  
狂謐寧志厥存沒揆首陽作戢山劉子傳綿綿姚江浙東以  
醇江西以正良畿躋襍羅楊詭亂望齡汝登逃戒慧定園槩  
折渠敢告復性作王門弟子傳明道以言不如以身鉉暨彪  
佳白首歸以全應鰲隱跡宗義纂言死復生不報何千萬年  
作劉門弟子傳趙氏忽有民程黃錄之丞相開府生祭者北  
死哭者西六陵冬青英孫珏來咽咽曲水蘭亭葬於斯作宋  
遺民所知傳裂儒冠而僧師法別承徐枋顧絳陳恭尹之貞  
璞完厥有徵作前明遺民所知傳書院飛以革半霖有璧載



剝而復致良知是力誨爾後生無忘前則尙是游是息作姚  
江書院傳人人自作傳家家異同厥君有錄厥子有牒系厥  
臣有跡蹤耆舊有聞用紀於故邦作倪文正施忠愍諸傳數  
十篇先生卒後門弟子合記序雜文編之爲思復堂文集二  
十卷刻焉又考書院始末作姚江書院志略四卷間從宗義  
問逸事受海外錄行國錄作東南紀事同邑張五臯從海外  
笑舍歸先生就與諮論合以馮甦見聞隨筆作西南紀事二  
書未成或云成輒燬矣娶陶氏生子四長承濂國子監生考  
授州判次承明次繼雲康熙丁酉舉人陝西西鄉縣知縣次  
承朱孫九人承濂等初葬先生於慈谿之龍山仁和龔翔麟  
銘其墓後以形家言曰不吉又改葬先生之弟行向榮晉涵  
祖父也嘗從先生問古文法歎曰紹興自文成講學傳授矩

獲代有四明所在多遺獻若張岱曰章成撰著卓然先生實兼承其業自先生沒而紹興之師法與史學絕矣筠謹案表以表其人之大者今制三品以上用神道碑四品以下用墓表宗義金石要例曰墓表有銘不可謂非也先生厥光不曜而行與文實應銘法筠旣表先生兼取義於昌黎韓子所以銘施士丐者而重爲之系曰

君爽之邑系姓惟邵秦漢越宋餘姚支克肖代其有聞傳授異同以節開先生曾祖母翁聖亦有教曰文曰行言修之道守先正正一髮引鈞視斯郡土脉先生死矣師微業絕卜改葬骨肉其言在家祀先生于鄉鄉先生耶

翰林院待詔小湖高先生墓表

沈大成

翰林院待詔小湖高先生旣葬之十四年叔子中書舍人羽

翼踵門告曰先君之沒也子之師宮允黃公實爲之傳而墓  
上之石未刻敢以爲請余往居東郊時曾奉教於先生而舍  
人又同志於古者也爰不辭而爲之書曰自俗學盛行士皆  
弱於故習而不知反諸古蓋舉世之通病矣有好古讀書之  
君子出焉或且以爲駭人之而其說大明其人已逝往往有  
不可及見之恨不朝夕其側而上下其議論也先生幼承太  
常公之訓長親炙秀水朱檢討而交吳中惠紅豆何義門張  
匠門諸名士故嗜古最深而痛絕乎流俗自受

仁廟知特奏名出身應奉文字十一年乞假歸優游林泉者  
又二十九年始捐館舍齒八十有七矣先生旣繩家美又得  
檢討諸公之揚挖故其爲學一本於經史而尤長攷訂其說  
古今典禮皆有據依其爲詩專尚唐賢其商榷一集足爲五

言程不止備郡文獻也先生爲人守正而剛其講學獨宗漢  
儒其持論堅其與人交不阿故其從宦有陰倚之者居鄉亦  
不滿於庸衆之口也吾郡之文苑開於二陸梁陳則陸佐公  
顧希馮唐則顧逋翁父子元則陸宅之曹貞素明則管時敏  
袁景文陸子淵顧士廉其季也幾社陳夏諸公代興號爲極  
盛本朝則吳曰千王玠右王雲士三君子狎主敦槃而金  
天石田髯洲盧文子三董二周諸先生後先推激而春藻大  
雅發聞於時先生出而專以古學教人當其時雖斷斷不能  
信從旣沒而異論熄大名垂數年以來吾郡之好古者輩出  
無不躋先生而樂推之所爲聞風而興起也余擣昧近先生  
之居思欲盡先生之學頻年奔走歸而宰木拱矣然余今日  
之知從事於古而不迷其所趨者實先生有以啟之先生諱

不騫字查客晚自號小湖郡之華亭人葬於乾隆某年某月  
日墓在某縣某鄉之原其事迹具官允師傳中特表其有關  
於吾郡之古學者以諗於後云

任幼植墓表

施朝幹

今天子崇尚經術海內士大夫講求註疏之學以余所識若  
王鳳階朱竹君錢曉徵諸先生及湯君文起任君幼植靡不  
勤搜典冊制度名物文字音韻之屬研精覃思馳騁上下烏  
虜美矣君諱大椿幼植其字自其王父諱陳晉者以通經聞  
吾郡所謂似武先生者也君紹厥緒益大以博始爲詩賦幽  
深崛竒旣乃專門考古學者宗之君以二甲一名進士官禮  
部主事乾隆三十八年四庫全書總裁大臣奏充纂修官禮  
經同異稟職爲多是時奉勅撰書目若干卷條分義舉鈞

剔醇駁簡要該洽出君筆者什七僉曰任君當改官翰林矣  
竟不果五十四年五月以郎中授陝西道監察御史未蒞任  
而病六月卒年五十二君宦京師久惟鱗戶讀書不肯謁權  
貴人嘗謂余曰今考據家輒務取名鮮自得亦僞學耳所著  
書有經典弁服釋例八卷深衣釋例三卷釋網一卷吳越備  
史注二十卷小學鉤沉二十卷字林考逸八卷詩六卷烏虜  
以君之才向使爲文學侍從臣上之可以追蹤周佚魯克勤  
成一代不刊之典次亦不讓相如上林楊雄羽獵之作而乃  
趨走郎署十有四年甫列臺官忽焉徂歿然吾觀有明若歸  
熙甫六十登第猶且浮沉外吏逮以南太僕丞留掌制敕旋  
至不起距通籍初僅六年耳或又以無子爲君惜則近世若  
顧寧人魏叔子輩老死無後者可勝述邪抑亦從古以來富

貴福澤必萃於夸毗不臧之身邪君旣卒之四月弟大以喪歸葬某鄉某原余與君生同郡長同學仕同寮爰詮次其大略而書之曰是爲吾揚州府興化縣監察御史任君幼植之墓

處士陳先生墓表

錢大昕

嗚呼自科舉之法行士大夫習其業者非孔孟之書不觀非程朱之說不用國無異學學無他師真所謂一道德以同風俗者矣然學者自就傅而後粗涉章句卽從事於應舉之文父師所講授無過庸輿軌轍之詞得其形似便可以致功名轉不如講賦策論之難工由是六經諸史束之高閣卽四書之義亦唯勿深求譬猶必芻誦經禮懣志在乞食而不在修行業繼履焉攷元時始以四書義取士當時士大夫謂天理

同根人心誦其言者眾則爲其道者將多迄今垂五百年自  
通都大邑以至窮鄉蠻徼無不知誦四書尊程朱而未見有  
爲其道者所誦者禮義所好者名利豈口耳之果無與於身  
心乎何其相戾之甚也於此有人焉能究心於四書以自淑  
其身而不爲科舉之學可不謂豪傑之士乎太倉之南鄉有  
陳君宏猷者幼而穎敏年二十五始慨然有求道志或勸應  
童子試謝不應家貧教授生徒自給手四書一編晨夕研討  
雖燕居衣冠必正數十年如一日鄉里笑其迂呼爲小朱文  
公君以爲誠然歛然曰吾無其實敢有其名乎甯化雷公鉉  
視學江蘇君攜所著四書晰疑往謁雷公延以賓禮留署中  
講論無虛日以爲相見晚也君以少時好談易繼乃專力於  
四書晚年復作四書就正錄理益淵邃而言極平易間出一



二新意或疑與註異則曰明經當以理爲主與其屈經從注何如舍註從經耶明季陳孝廉確菴以講學名或言君爲確菴之後君悚然曰非也然豪傑之士必有待而興乎其立志如此君諱鋌宏猷其字其卒以乾隆二十八年十月二十九日春秋七十有三葬於十七都七圖鹽鐵塘今之士大夫諱言道學懼無實而冒其名或藉以梯進干譽爲世所輕詭然聖賢之言具在優而柔之厭而飫之終身不怠而未嘗志於祿利與世競一日之名若陳君者洵加於人一等哉予居嘉定西鄉之望仙橋去其廬不二十里顧未嘗與君識面君既沒門弟子王濤持其遺書請予文表其碣予非能知君者嘉濤之不忘其師重違濤意而爲之辭蓋師死而不之背亦今人之所難也

贈儒林郎翰林院檢討彥傑曹公墓碣 錢大昕

吏科掌印給事中汾陽曹君學閔一日過其友同年錢大昕告之曰某之先人行甚高而不求聞於世既歿四十年士大夫數鄉之耆德宜有後者必首屈一指焉夫無善而誣其先非孝也有善而不能彰非義也某生十二年而孤於先人行事知之不詳惟夙所聞於先太宜人及親故常所稱述不誣者粗識一二乞吾子一言以誌墓石給事人品修潔其文質直無虛詞乃詮次而志之曰公諱曰英字彥傑世居汾陽城北十里太平村曾祖朝士嘗遇異人授以術可暴富終不一試客請以千金受其方曰挾術而忘義豈惟害人兼將害己固弗與易簣時告其子曰吾得異術非不知可少利汝曹也然遺之以利何如遺之以正乎術竟不傳公未冠失所怙事

母夫人孝爲邑諸生有聲庠序間與人交有終始重然諾倜儻好施予宗黨賴以舉火者甚衆邑有王惠庵先生者孝子也貧而樂道獨與公善歲時常餽之粟寒則遺之布人或效公所爲先生輒怒曰若豈彥傑比哉安得以所有溷我張媼者於母夫人爲中表姊妹嫠老無所依公養之終其身張病且死語人曰吾受曹氏恩無以報天道有知其子孫必有顯者矣汾之土斥鹵可鹽塞外鹽亦間有擔以至者例皆禁不得受而令商轉安邑池鹽鬻於市道險又回遠鹽並貴豪商倚勢凌平民輒誣以私販罪公稔其害糾同志詣官白狀請均其稅於糧而遂商事得行民至今以爲便居鄉務爲退讓子偶與村氓詬語卽扶之曰此吾鄰里卽汝諸父行孺子敢無禮耶親詣氓舍謝失教不計其曲直也年五十有一自剋

其亡之日病革家人移牀正寢笑曰尙須數刻及期整衣冠而逝實雍正九年九月三日也配王宜人壽陽縣儒學訓導凝道公之女奉養君姑數十年無間言後公二十歲卒子男四人長學曾次學思次學雍給諫其叔子也登乾隆甲戌進士由翰林累遷今官孫男六人延齡喬齡錫齡鶴齡祝齡保齡曾孫十五人汝廉汝淳汝瀾汝淵汝儉汝淦汝洵汝勤汝涵汝清汝直汝藻汝浩汝淳給事又言公歿後數日見夢於給事張蓋輿馬道從甚盛到家撫子弟如平時類世俗所祀神人嗚呼幽明之理固不可測而行道有福其常也世果有神人其必正直而壹者矣生不求聞死而神之此理之可信者夫給事在翰林日逢國大慶得贈及父母勅贈公儒林郎翰林院檢討王宜人贈安人葬在本村之西原以乾

隆十八年歲次癸酉正月二十六日銘曰

西河古郡卜子所教凜然節概先民是倣  
寧寧曹公行善于鄉貞固隱括以矯俗涼五十未衰乘化則止匪天靳之以昌  
孫子幽蘭空谷其芳不言過者必式有道之吁

沈房仲墓碣

杭世駿

昔眉山蘇氏父子兄弟自相師友史冊書之以爲美談吾鄉  
沈氏其殆庶幾乎東閩先生爲海昌查少詹聲山愛壻其作  
合也以詩有子三人次公房仲則沈氏之東坡也浙西自朱  
檣討竹垞俎謝海內之稱詩者以海昌二查爲巨擘房仲少  
從初白翁遊繼又采獲於查浦侍讀初白稱其含英咀華宮  
商協奏不難步武香山凌鑠蘇陸而侍讀亦無異同之論其  
族叔歸愚亦謂視天地間無結轡不可解之事亦無哽咽不

可道之詞士林以爲篤論房仲流覽旣富遊歷漸廣南踰嶺  
嶠北抵梁齊過都歷塊以沈雄磊落不可控抑之簡語一洩  
其胸中之奇凡從學於查門者未有能過之者也初自弱有  
女孫愛其才遂請爲繼室盧吉士六以序東隅先生之詩引  
謝師厚妻黃魯直事以目少詹查浦又述其語以曰初白余  
謂授受淵源卽繼以婚姻之好遠自聖門而燉煌繼美韓之  
李漢朱之黃幹均斯義然則海昌爲沈氏兩世之壻鄉謂吾  
舅者吾謂之舅爾雅釋親有四而房仲居其二以母黨則彌  
甥以妻黨則館甥也房仲在兄孟公弟萩林之間無腰鼓之  
誚萩林觀察登萊提刑齊豫宦轍所至遊履必偕家庭讌語  
朋友遊處獻酬羣言抒寫獨得皆以詩爲職業若起居服用  
之不可須臾以離又若飲食男女之不可一日以廢縛心瘁

力歲月耗磨欲詩之不工且富其可得乎歸老窮鄉有孟東  
野之窮無張子野之壽其可哀也亦所以成其爲詩人矣菽  
林葬君於某山之原謂余曰吾兄辱與子厚志墓之文非子  
莫屬余曰諾房仲名心仁和諸生家嘉善有孤石山房集系  
以詩曰

君貌不揚詩最工清氣益益蟠心胸墓門樹檟號寒風中瘞  
瘦骨如青銅其骨或朽詩不朽斯語請質初白翁

孝女吳淑士墓碣

杭世駿

孝女吳瑩字淑君私諡淑士海寧人也父應鳳患滯下伯兄  
琦文重繭走二百里之石門覓醫醫他出卽迹之武康血流  
被屢不知也醫術不肯行處方與之益增劇琦文哀憤甚  
引刀割股而刃弗殊一臂幾折執喪廬墓三年母汪以蠶哭

故將失明朝夕舐之數月而光復旋患高中死法琦文博求  
方術以時消息其病之所起主其湯液醪醴者女弟瑩也視  
無形聽無聲綿冬及夏不夙則莫脇未嘗貼席口未嘗甘味  
也歷六七年而毋瘳而孝女憊矣形瘠神離不可爲矣年二  
十有九時康熙歲在甲戌六月八日也琦文獲旌入忠孝節  
義祠而孝女不得請何也琦文之孝顯孝女之孝隱顯者可  
以辭達可以筆述官司可據以入 告隱則深知者能信不  
知者不信也又非可人人強而與之語又非可人人強而使  
之證也兩楹之殯閱九年歲在壬午某月日兄子有曦始克  
葬於硤石祖塋西偏蓮漚之原碣曰孝女吳淑士之墓女徹  
環瑱願養父母如北宮之女嬰兒子之所爲母哀其志贅同  
邑朱氏子爲婿女故朱氏婦也宜稱婦說春秋曰婦者從乎



姑之辭也孝女不及事姑無阼階著代之文無三月廟見之事孝之名懸而無薄不屬於母而誰屬也孝於母在吳則爲孝女穀梁子所謂以我禮之也以我禮之則猶然女而不婦也女而不婦則婦之不可也曾子問女未廟見而死如之何孔子曰不遷于祖不耐于皇姑歸葬於女氏之黨壻無御輪之迎父無反馬之致魂魄得依所親聖人之所不禁通儒之所不議孝女之孝雖九原不隔也然則可祭於祠乎古無其禮也古無其禮而吳氏行之所謂禮以義起考有宮而孝女無子奠有廟而孝女無女無子無女而有若敖之饌是吳氏之愬其祠也所以酬其孝也諡曰淑士義何居也詩曰釐爾女士女有士行則與凡爲女者有聞孝女讀書明大義從伯兄學潛心經術非聖之書不觀吾志其墓據經以立言孝女

之士行見孝女之與兄同爲純孝者亦見系以詩曰

惟孝有五不及婦人男統乎女聖經不云女嫁曰歸義在食  
貧有舅有姑至死服勤偶或歸寧不能終身抑搔疴癢勢不  
得伸北宮嬰兒冠古鮮倫至老不嫁志在養親修川女瑩降  
靈自天依母爲命若將終焉母爲擇對不送之門壻焉出贅  
女不往嬪母疾危厲食不下咽蛾眉宛宛含愁而輦量水稱  
藥斟酌等分時其起居時其夕晨時其消息忘寢與飧洗手  
作羹味適八珍母飲而甘母食而芬回幹造化收召魄魂以  
友精氣益母元辰綿八寒暑沈疴頓捐醫工咋舌技窮而歎  
歎女純孝驚猶天神母則痊矣女則瘵矣神離形瘵大命莫  
延偏親號咷伯兄涕漣雨楹布奠有文一篇誦女力學非聖  
不觀生孝猶易死孝實艱使堂歛昨褻衣不陳漆鐙無光總

帷久懸敢塗不啟凡閱九年兄子猶子葬之新阡連漚之兆松柏萬千諡曰淑士告於几筵碣曰孝女表於隧塋敦我一老據經立言春秋書法禮堂舊文虛公酌議誄詞璘璣煒我彤管以俟愍綸

章烈婦墓碣

邵齊燾

孀人姓章氏諱孔榮陝西秦安人年十五嫁張廷桂爲後妻廷桂者字相如江南常熟人父溺陝西蒲城縣知縣康熙四十五年卒官初蒲城君與同邑魏士升友善嘗爲廷桂聘其女蒲城君卒數年而士升知秦安縣廷桂往依焉踰年所聘士升女天又五年士升行取改京秩從至京師士升尋歿遂歸娶同邑錢煥昭女爲妻生一女而妻卒雍正中廷桂避事復之秦安因爲章氏贅壻居八年與孀人情好甚篤頃之孀

人父母相繼卒廷桂事尋解乃與孺人歸常熟廷桂貧旣歸  
無居舍孺人盡鬻糶具得百餘金僦屋三間居之恨不逮奉  
養享祀必潔及嫁前妻所生女備有恩紀夫或遠出自以盛  
年單露常懸劍帳側以擬倉卒生二子俱殤最後生一女名  
催鳳會廷桂故人今安西道錢鑒知撫甯縣請廷桂管記乾  
隆九年十二月廷桂病歿撫甯明年二月訃至孺人哀動殯  
絕柩歸與錢氏合葬縣西門外烏目墩旣窆孺人欲投中  
家人共持止之孺人旣無子獨與幼女單居家益困夫從弟  
廷梅許俟有子後兄孺人乃鬻其居得錢買田十餘畝自給  
而依廷梅居焉閉戶織作所處雖淺隘隣婦罕見其面夫先  
入貲戶部牒授主簿夫歿或購其牒覲以圖銓孺人曰吾以  
貧故鬻牒欺罔國家罪也况夫名可使有二耶立焚其牒十

二年五月服除奠畢闔戶自縊家人覺解之防守甚至次日  
既夕守者稍倦潛至水側抱夫畫像置岸上自沉死比曉家  
人始知之見屍面夫畫像端坐不動時按察副使孝感程公  
光鉅聞之立往率屬設祭親拜其屍上其狀請旌於朝報  
可初孺人嫁時不知書廷桂時時教之久遂通解略涉傳記  
將歿作絕命詩辭數章詞旨哀惻其末一篇云憶往事兮雙  
淚沾巾想當年兮妾病沉憯感君愛兮信誓殷勤云妾歿兮  
君必亡身嗟今日兮命不由人君先亡兮妾豈偷存痛萬里  
兮生會無因輕一命兮地下從君求神明兮引我孤魂覓天  
涯兮不惜艱辛得伴君兮死亦歡欣十七年兮夫婦恩深食  
糟糠兮敢怨君貧申路訣兮命蹇時屯喪葬畢兮不死何云  
傷幼女兮失母誰親死爲君兮此外何論又留書與夫諸從

弟曰初聞訃卽欲死念夫無後無人喪葬今日服除一死更  
無別事前議俟叔生子爲夫立後勿誑我無後孤魂但家事  
空空無可如何止有田十四畝可將十畝與所嗣子四畝與  
鳳女我死棺木不可多費我心不安有許氏屋價十金乞將  
我埋先夫塋次愚嫂章孔榮手留孺人卒時年三十四催鳳  
始七歲明年亦夭夫諸從弟曰益貧所遺田盡廢竟以子姓  
凋少未立後廷桂有老僕數嘗營葬孺人不果乾隆三十  
一年三月二十八日邑諸生栢渭吳慶長等始葬孺人廷桂墓  
中因共立碣表墓來請余文余與廷桂交舊又多諸君之義  
會忝舊史敢闕其辭乃爲銘曰

有婉淑姿生彼陝鄂萬里違鄉自秦來吳甘窮食貧徇夫沉  
軀薦服薦酹烏頭表閭厯載二十葬從其夫垂風列女刻銘

山陽山壤有朽芳名不渝

湖海文傳卷五十一